

STRONG BILONG OL MERI LIDA LO HAUSLAIN/PLES: OL STORI IKAM LONG OL LIDA BILONG LUMUSA INSAIT LONG PNG MERI FAMA BISNIS PROJEK

Stori bilong Patricia

Mama ibin karim Patricia long Sauten Hailens insait long Papua Niugini. Papa mama bilong em i wok misinari long Katolik sios. Em i lusim skul taim em wokim Gr 10 long wanem femili bilong em ino inap long painim mani inap long em i ken pinisim skul bilong em. Bihain liklik em marit na lusim wok bilong sios. Em wok olsem wanpela hetmeri we em i yusim ol save em i lainim long papa mama bilong em na tu wantaim ol save bilong wok em kisim insait long sios na hauslain. Patricia save nau olsem em igat save long sanap olsem lida, dispela em lainim gut long papa na mama bilong em na ol het manmeri bilong sios.

Patricia wantaim man bilong em ikam bek na stap long ples bilong man bilong em long Lumusa. Long hia nau, man bilong em tok lukaut long em olsem wok bilong kamap man or meri lida bilong ples save igat pasin resis istap. Em i no laik tru o tingting long resis wantaim wanpela narapela man o meri long kamap lida tasol insait long bel na tingting bilong em, em save olsem inap long ol save bilong lida, na em ibin amamas tru taim ol i askim em long kamap wanpela projek lida. Tasol em ino kam isi, em kam wantaim hatwok bilong em. ‘Mi givim bel tru na kam olgeta taim long dispela trening. Mi bungim hatpela taim long dispela taim long wanem ol hauslain tisa ol kolim long Village Community Educators (VCEs) i save koros wantaim mi olgeta taim. Ol VCE ino save laik tru long harim toktok bilong mi, ol i wok long tok baksait long mi long wanem mi kamap lida bilong ol.



Patricia i tok out klia olsem em bin inap long go bek na stap long ples bilong em yet taim em i bungim hevi insait long marit, tasol strongim tingting long stap long Lumusa wantaim femili bilong em long hap. Em tingting long mekim dispela wok igo yet na itok amamas igo bek long man bilong em long sapot bilong em. ‘Mi bai ino inap slek na mi mas wok moa yet olsem wok lida, bilong wanem, man bilong mi i save sapotim mi gut tru. Man bilong mi i lukim ol senis kamap long laip bilong mi na mekim ol gutpela toktok taim mi tokim em ol save mi kisim long trening’. Patricia pilim em kisim planti strong long wanem dispela trening i helpim em long wok bilong lida na tu long laip bilong em yet. ‘Wanem samting mi lainim long dispela projek i senisim laip bilong mi na femili bilong mi tu. Dispela trening is strongim mi long kamap/stap strong, na mi tok bikpela tenku igo long ol bisop, paterr na papa mama bilong mi long ol gutpela skul toktok bilong ol olsem yu mas mekim gut long ol man/meri i mekim nogut long yu’. Em strongim ol meri husait man bilong ol i gat planti meri long stap bel isi na daunim ol yet na beten long hevi na wari bilong ol na traim olgeta rot long mekim femili istap wantaim.

STRONG BILONG OL MERI LIDA LO HAUSLAIN/PLES: OL STORI IKAM LONG OL LIDA BILONG LUMUSA INSAIT LONG PNG MERI FAMA BISNIS PROJEK

Ol traim/hevi we Patricia isave bungim em olsem, ol pipol ino save tingim taim na save kamap binhain tru o lusim wok hariap taim ol i wok long bulb onion fam. Em save sampela i rispektim em tasol ino olgeta lain. 'Mi save pilim nogut taim ol meri ino kamap long taim bilong trening or long model fam bilong mipela. Igat sampela lain insait long hauslain i rispektim mi olsem lida, tasol ol narapela ino laikim mi na save kirapim bel kros na trabel nabaut.

Patricia nau igat bikpela laik tru long lainim moa yet long sampela bilong ol het tok bilong trening na tu long olgeta hap tok tu. Em tu gat bikpela laik long mekim wok long ol save em kisim, tasol em nogat ol samting olsem ol material bilong wokim banis raunim gaden we em ken growim kaikai. Em tok dispela bai banisim pik long kam insait na bagarapim gaden kaikai bilong em.

Long bihain taim Patricia i tingting long salim pik bilong em na yusim mani long wokim wanpela haus kapa klostu long bikples – bilong stap klostu wantaim ol narapela meri long wok na sapotim. Patricia laikim pikinini man bilong em long kamap lida long bihain taim, olsem na em i save traim long soim ol gutpela pasin we papa mama bilong em i lainim em, traim olgeta taim long stap bel isi na soim ol narapela gutpela pasin. Em save kisim gutpela bel na tingting long papa mama bilong em, we em ilukim mama olsem nambawan piksa bilong gutpela pasin na meri bilong pre, na papa olsem man bilong daun pasin na man husait i kirapim bel na givim em strong long mekim ol gutpela wok. Long i stap lida long hauslain bilong em, Patricia i luk olsem em hat wok tumas na em save ting olsem ol pipol mas lukim olsem em i no laik kisim ples na wok bilong ol narapela. Bikpela tingting i stap long sapotim femili na hauslain. Dispela em lidasip stori bilong em.

Patricia is one of several VCEs in PNG involved in this ACIAR funded project. We share her story with her consent. Go to <http://pngwomen.estem-uc.edu.au/> to find out more about the training tools and project.